

Illup sananeqarneranut akiusup minnerpaaffissaata inatsisitigut aalajangersarneqartup appartinneratigut pisortat inissiaataanni attartortittakkani ineqarnermut akiliutip appartinneqarnissaanut periarfissat misissoqqullugit Naalackersuisut peqquneqarnissaannik Inatsisartut aalajangiiffigisassaattut siunnersuut. Misissuinikkut ineqarnermut akiliutip, illup sananeqarneranut akiusup, piginnittut aningaasaliissutinit iluanaarutissaasa aammalu ineqarnermut tapiissutit allangornerisa imminnut ataqatigiinnerat paasinarsisinneqassapput kiisalu aserfallatsaaliinissamut pilersaarutit attatiinnarneqarnissaat isiginiarneqassalluni. Kiisalu illup illuutit aserfallassimasut sananeqarneranni naliusup ingerlaavartumik nalikillilerneqartarnerani pitsaaqutit ajoqutillu misissuinikkut qulaajarneqassapput. Misissuinerup inerneru Inatsisartunut kingusinnerpaamik juli 2022-imi agguanneqassapput (Inatsisartunut ilaasortaq Erik Jensen, Siumut)

Akissuteqaat

(Ineqarnermut, Attaveqaasersuutinit, Aatsitassanut, Inatsisit Atuutsinneqarnerannut Naligiissitaanermullu Naalackersuisoq)

Siullermeerneqarnera

Aallarniutigalugu Inatsisartunut ilaasortap Siumumeersup Erik Jensenip aalajangiiffigisassatut siunnersuuteqarneranut, Naalackersuisut sinnerlugit qutsavigaara.

Najugaqarfiit inissianik piginnittunut aningaasartuutissaannik tamanik akiliisinnaassuteqartillugit, Namminersorlutik Oqartussat kommunillu inissiaataanni attartortittakkani ineqarnermut akiliutit aalajangersarneqartarput. Matumani aningaasaliissutinit iluanaarutinit aningaasartuutit ilanngullugit. Najugaqarfimmi isertitat aningaasartuutinit naapertuunnissaat, attartornermut peqqussummi tunngaviuvoq.

Namminersorlutik Oqartussat illuutinit aningaasaliinermi iluanaarutissatut aalajangersarsimasaat aningaasaliissutinit iluanaarutaavoq. Sanaartorneqarnerani nalingata 1,5 procentia iluanaarutigineqartarpoq. Illuutip sanaartorneqarnerani nalingata naatsorsorneqarnerani sanaartorneqarnerani aningaasartuutit tamarmik ilanngunneqartarput, matumani pilersaaruserneq, nakkutilliineq, sanaartorfigissaanerlu ilanngullugit. Taamaakkaluortoq sanaartornermi aningaasartuutiit qassiugaluarpataluunniit kvadratmeterimut minnerpaamik 7.000 koruuniussaaq, kvadratmeterimullu annerpaamik 15.000 koruuniulluni.

Aningaasaliissutinit iluanaarutit nunatta karsianut ukiumut 47 mio. koruunit missaat isertinneqartarput. Taakkunannga 7 mio. koruunit missaanniittut najugaqarfinni aningaasartuutinit assigiinngitsunut atornerqartarput, soorlu assersuutigalugu illuutini mikinerusunik ingutserinernut, najugaqarfinni naatsorsuutiginnisamik aningaasartuutinit imaluunniit illuutini aserfallatsaalineqarsimanngitsuni immikkut ittumik aningaasartuutinit kiisalu ingutserneqartussaallutik inissianut najorneqanngitsunut.

Tamatuma saniatigut aningaasanut inatsisitigut allatigut aningaasaliissutinit ukiumut 85-95 mio. koruunit missaanniittut Namminersorlutik Oqartussat inissiaataasa iluarsartuunneqarnissaannut, aserfallatsaalineqarnissaannullu immikkoortinneqartarput.

Aningaasaliissutinit iluanaarutit appasinneruppata ineqarnermut akiliutit appasinnerussapput, taamaassappalli ineqarnermut immikkoortumi pingaarnersiutinissamut nunatta karsiani isertitat aamma ikinnerussallutik. Inissiami aserfallatsaalineqarneq ajortumi ineqarnermut akiliutit appasinnerussammata, attartortut ilaat taakkunani ineqarusunnerunissaannik kinguneqarsinnaavoq. Ilutigisaanillu kinguaattoorutit annertusiartuinnassallutik.

Taamaattumik Naalackersuisut isumaqarput, tamat isiginnissuseqartumik ineqarnermut immikkoortumut tunngatillugu eqqarsartoqartariaqartoq. Ineqarnermut akiliutinik aaqqissuusseqqinnermi, ineqarnermut akiliutini ilaannai pinnagit immikkoortoq tamaat isiginiarneqartariaqarpoq.

”Ineqarnermut akiliutip, illup sananeqarneranut akiusup, piginnittut aningaasaliissutinit iluanaarutissaasa aammalu ineqarnermut tapiissutit allanngornerisa imminnut ataqatigiinnerat paasinarsisinneqarnissaannik kiisalu aserfallatsaaliinissamut pilersaarutit attatiinnarneqarnissaata isiginiarneqarnissaannik”, siunnersuutitigut Naalackersuisut peqquneqarput. Tamanna Ineqarnermut immikkoortumut tamakkiisumik pilersaarutitigut suliassani ilaatinneqareersutut nalilerneqarpoq. Siunnersuutitigut apeqqutigineqartut qulaajarneqarnissaat, inissiallu siunissami silaannarissuullutillu nukinnik atuivallaannginnissaat, ulluminnullu naleqquttuunissaat pillugu aserfallatsaalineqartarnissaannik qulakkeerinnittusanik ilutsinik ineriartortitsinissaq pilersaarutitigut ilaatigut siunertarineqarpoq.

Siunnerfeqarnerusumik ineqarnermut tapiissuteqartitsinikkut appassisumik isertitalit akiliisinnaassuseqarnerisa eqqarsaatigineqarnissaa, Ineqarnermut immikkoortumut tamakkiisumik pilersaarutitigut qulakkeerneqassaaq. Soorluttaaq ineqarneq pillugu aaqqissuusseqqinnermi appassisumik isertitalit sapinngisamik minnerpaamik eqqugaanissaannut tapertaasinnaallutik tapeeriaasiusinnaasut allat misissorneqassasut. Attartortut kiassarnermut aningaasartuutaat ullumikkut ineqarnermut tapiissutit naatsorsorneqartarnerinut ilaatinneqarneq ajortut, assersuutitut taaneqarsinnaapput. Imaappoq, attartortup qaammammut aningaasanit nammineq atorsinnaasaminit kiassarnermut akiligassani akilertarpai.

Ukiut 10-15-t pineqarput, tamannali uniffigissanngilarput. Suliaq aallartinneqassaaq, piffissallu ingerlanerani suliniutit inuiaqatigiinnut annertuumik iluaqutaalerumaarput – attartortunuinnaanngitsoq, aammali iluarsartuussinernut atatillugu suliffinnik pilersitsinikkut. Sanaartornermi sulisoqarnikkut piginnaasat ineriartortinneqarnissaannut pilersaarut tapertaassaaq. Ataatsimut isigalugu Ineqarnermut immikkoortumut tamakkiisumik pilersaarut ineriartornermik, inissianik pitsaanerusunik, ilaqtariinnullu pitsaanerusumik pilersitsissaaq.

Tamanna tunuliaqutaralugu Naalackersuisut inassutigaat siunnersuut akuersissutigineqassasoq, ugartorneqartullu suliami ingerlasumi qulaajarneqassasut qulakkeersinnaallugu.